

## SURANA PAUL TO JAMA'A I KOLOSE

### *POGAU BHAA-BHAANA*

Kolose sii satotuuna saangu kota modhaangiana i poropinsi Asia Maidhiidhi, i weta i timbuna kota Efesus. Kota Efesus sumai ibu kotana saangu poropinsi Asia Maidhiidhi, tee Asia Maidhiidhi sumai poropinsina lipuna Roma. Sii-sii o tampana Kolose tee Efesus atosarongi Turki. Mencuana Paul mopakakarona jama'a i Kolose sii, maka wakutuuna Paul alamboko manga mokaaraana minaaka i Efesus, incia anamisia dhaangia tee tanggojawapuna uka to jama'a i kota Kolose sumai. Paul padhamo apotibhaaka lele, ande i nuncana jama'a sumai dhaangia manga guru moadhariakana kaadhari mosala. Fikiri ikeniakana manga guru sumai mboo sii, siitumo to tapomatau tee Aulata'ala tee mamudhaakana tatopasalaamati, mia tabeana asomba "manga rohi mokuasaina tee moparintana saangua alamu." Mencuana soo incia sumai, maka manga guru sumai apogau mboo sii uka, manga mia tabeana ata'ati tee aose tuturana tandakia, aose opea mopadhana ilarangi tee mosagaanana uka.

*Surana Paul To Jama'a i Kolose* sii aburia to apatokamataaka kaadharina Karasiteni mobanara tee abhali kaadhari mosala iadhariakana manga guru gau-gau sumai. Antona sura incia sii satotuuna ande o Isa Al Masi amembali

apekadhawuaka kasalaamati mompuu-mpuu tee o kaadhari mosagaanana sumai tangkanamo bheapekaridho mia minaaka i Al Masi. Alaloi Al Masi, Aulata'ala apadhaangia dunia sii, tee alaloi Al Masi uka o Aulata'ala apasalaamati maanusia. Tangkanamo alaloi taposaangu tee Al Masi, dunia sii dhaangiapo amembali aharapu to atopasalaa-mati. Sapatdhana sumai, Paul apetulatulaakamo pokaiana kaadhari momalanga sumai tee dhadhina miana Karasiteni.

Faraluu uka atopogauakea iwe sii, ande o Tikhikus -- mobhawana sura incia sii i Kolose to Paul -- asabhangkea Onesimus, bhatua itumpuna Paul to ambuli i opuna, siitumo Filemon, samia jama'a i Kolose.

### **Antona**

Porikanaana pogau 1:1-8

Sifatu tee bhari-bharia ikarajaana Al Masi 1:9-2:19

Dhadhi bhaau inamisina manga miana Karasiteni 2:20--4:6

Kapadhaa 4:7-18

### *Salamu*

#### *1:1-2*

<sup>1</sup> Minaaka i Paul, iangkana Isa Al Masi amembali rasulu rampaakanamo kapeeluaana Aulata'ala, tee minaaka i witinaita o Timotius.

<sup>2</sup> To bhari-bharia mia mosaalihi i Kolose, siitumo manga witinaita mota'atina\* tee Isa Al Masi:

---

\* **1:2 1:2** *mota'atina*: Amembali uka akoma'ana "moparacaeana."

Rahumati tee dhadhi malape minaaka i Aulata'ala o Amata,<sup>†</sup> apoose tee ingkomiu.

*Emaniana Sukuru tee Do'a*

*1:3-14*

<sup>3</sup> Ingkami sadia taemani sukuru i Aulata'ala o Amana Isa Al Masi Oputa Momalanga, wakutu-una kuemaniakakomiu do'a.

<sup>4</sup> Ingkami tarangomea ande ingkomiu uparacaea tee Isa Al Masi tee ingkomiu umaasiaka bhari-bharia mia mosaalihi,

<sup>5</sup> rampaakanamo uharapuaka opea motodhikana to ingkomiu i sorogaa. Giu incia sumai padhamo urangoa i piamo itu i nuncana kaadhara kabanara, siitumo i nuncana Lele Malape,

<sup>6</sup> mopadhana ipakawaakana to ingkomiu. Lele Malape sumai mboomo wine motopombulana i tana tee akobhake tee ajulu i saangua dunia tee atorotorosu aumbaaka kabarakati, apokana tee momembalina i tanga-tangamiu pepuu minaaka urangoa tee uma'anai rahumatina Aulata'ala tee bhari-bharia kabanarana.

<sup>7</sup> Giu incia sumai aadhariakakomiu Epafra, sabhangka imaasiakamami. Incia o mia molaianina Al Masi mota'ati tee akarajaa to ingkomiu.

<sup>8</sup> Minaakamo i incia ingkami tarangoa ande tee kuasa minaaka i Rohina Aulata'ala imembaliakamiu upomaamaasiaka.

<sup>9</sup> Rampaakanamo sumai, sarangomami giu incia sumai, ingkami indamo taunto-unto tado'aakakomiu. Ingkami taemani

---

<sup>†</sup> **1:2 1:2** *Amata*: Dhaangia uka manga kaburi mangenge minaaka i Kitabi Injili motoburina "Amata tee Oputa Momalanga Isa Al Masi." **1:7 1:7** Kol. 4:12; Flm. 23.

mamudhaakana o Rohina Aulata'ala  
adhawuakakomiu hikimati tee akala mobanara  
mamudhaakana ingkomiu apabukeakakomiu  
tee katauna kapeeluana Aulata'ala.

<sup>10</sup> Tee tado'aakakomiu mamudhaakana o dhad-  
himiu bhealaenga i aroana Kawasana Opu,  
tee ingkomiu bheupasanaa ngangarandana tee  
apeelua i nuncana bhari-bharia giu, sabutuna  
opeapo uka ikarajaamiu amembali akohasiliaka  
giu momalape tee ahanda umatau Aulata'ala.

<sup>11</sup> Maasangia tee kuasana Aulata'ala momulia,  
ingkomiu apekatangkakomiu, sabutuna ukapoia  
unarakaaka sagala giu hali tee usabara,

<sup>12</sup> sumaimo tee ngangaranda mokaunde-  
unde ingkomiu uemani sukuru i Amata  
siitumo Aulata'ala. Incia mopamembalikomiu  
ulaenga upotibhaaka kadhawu ipasadiaakana to  
manga mia mosaalihi i nuncana Pamarintana  
Momainawa.

<sup>13</sup> Incia uka mopadhana mangarambasakana  
minaaka i kuasana kalalanda tee mangapapinda  
i nuncana Pamarintana Anana imaasiakana.

<sup>14</sup> Alaloi Anana sumai Incia mangatolosi, tee  
a'amponi manga dosata.

### *Kalabhiana Al Masi*

*1:15-23*

<sup>15</sup> Al Masi satotuuna o gambarana Aulata'ala  
inda momembalina motokamata tee o Al Masi  
alabhi minaaka i bhari-bharia mopadhana ipad-  
haangia.

<sup>16</sup> Alaloi Incia, Aulata'ala apadhaangia bhari-  
bharia giu, malape modhaangiana i sorogaa

atawa modhaangiana i dunia, malape motokamatana atawa inda motokamatana, malape mokokauncuramakana, mokokuasana, mokopamarintana, tee mokenina kuasa. Saangua pamarinta i dunia sii, bhari-bharia sumai o Aulata'ala mopadhaangiaia alaloi Al Masi, mamudhaakana o Anana sumai amembali raja to bhari-bharia ipadhaangiana.

<sup>17</sup> Incia adhaangia porikana minaaka i bhari-bharia giu tee roonamo Incia bhari-bharia giu adhaangia i tampana sumbesumbere.

<sup>18</sup> Incia amembali kapala to jama'a, siitumo o badana. Incia o ana tumpe mobhaa-bhaana ipadhadhina pendua minaaka i mate, mamudhaakana Incia amembali atolabhiaka mpuu minaka i opeapo uka.

<sup>19</sup> Karona o Aulata'ala mopeeluna mamudhaakana bhari-bharia giu modhaangiana i karona, adhaangia uka i Anana.

<sup>20</sup> Tee alaloi Anana uka o Aulata'ala amambotuakea to apewau sagala giu to apomalapeaka pendua tee Incia, malape modhaangiana i dunia, atawa modhaangiana i sorogaa. Aulata'ala apewau giu incia sumai alaloi lembokana raana Anana i kau salib.

<sup>21</sup> Piamo itu ingkomu umaridho minaaka i Aulata'ala tee umusuia i nuncana ngangaranda tee fikirimiu. Giu incia sumai atokamata minaka i pewaumiu momadhaki.

<sup>22</sup> Maka sii-sii, tee mateana Anana, Aulata'ala apambulia pendua o pokaiamiu tee Incia amembali upomalape pendua. Tee cara incia

sumai ingkomiu umembali utobhawa upoaro tee Aulata'ala i nuncana kadhaangia momangkilo, inda tee kasalahamiu tee inda ukobalaci.

<sup>23</sup> Giu incia sumai bheamembali ande ingkomiu usadhaadhaa uparacaea tee ukakaro pekatangka tee iimanimiu, tee bholi ulimba minaaka i kaharapu modhaangiana i nuncana Lele Malape, siitumo Lele Malape mopadhana irangomiu tee ipakoleleaka i saangua dunia. Iaku o Paul apamembaliakumo mia molaianina Kawasana Opu tee kupaumbaaka Lele Malape incia sii.

*Kalaianina tee Kanarakaana Paul*

*1:24--2:5*

<sup>24</sup> Sii-sii iaku kukaunde-unde mpuu to bhari-bharia kanarakaa inamisiku to ingkomiu. Alaloi kanarakaana badaku inamisiku sii, iaku kupamondo kanarakaa bheinamisina Al Masi to jama'ana, siitumo o badana.

<sup>25</sup> Aulata'ala atumpuaku kumembali mia molaianina jama'a, mamudhaakana amembali kuadhariakakomiu bhari-bharia firimanina Aulata'ala,

<sup>26</sup> siitumo lele irahasiaakana Aulata'ala to bhari-bharia mia minaaka i atu-atuna tao i piamo itu, maka sii-sii apaumbaakamea to uumatina.

<sup>27</sup> To uumatina sumai o Aulata'ala gauna apaumbaakea tapanamo kalape tee muliana o rahasia sumai to bhari-bharia uumatina maanusia. Rahasia sumai satotuuna: Al Masi dhaangia i nuncana karomiu. Ma'anana giu incia sumai, ingkomiu dhaangiapo tee iharapumi to upotibhaaka kamuliangina Aulata'ala.

<sup>28</sup> Al Masimo sumai ipakoleleakamami to bhari-bharia mia. Ingkami taudhaniakea tee manga incia taadharia tee saangua hikimati-mami, mamudhaakana manga incia amembali tapasombaakea i Aulata'ala mboomo manga mia mokawana umuruna i nuncana akalana budina, roonamo aposaangumo tee Al Masi.

<sup>29</sup> Siitumo i'usahaakaku tee ipotimbeakaku tee saangua kakaana bukuna Isa mokokuasana tee mokarajaana i nuncana karoku.

## 2

<sup>1</sup> Iaku gauku kupaumbaakakomiu tuaapa o kakaaku ku'usaha to ingkomiu tee ku'usahaaka manga miana Laodikia, tee bhari-bharia mia indapo momatauaku.

<sup>2</sup> Giu incia sumai kupewaua mamudhaakana incana manga incia atohiburu tee manga incia aposaangu i nuncana kaasi, sabutuna manga incia atotuu-totuu ama'anaia o kabanara tee ampuu-mpuu ayaakinia. Tee mboo sumai, manga incia bheamataua o rahasiana Aulata'ala, siitumo Al Masi.

<sup>3</sup> I nuncanamo karoni Al Masi sumai atodhika bhari-bharia hikimati tee ilimuu mokoharagaa minaaka i Aulata'ala.

<sup>4</sup> Iaku kupogau mboo sumai mamudhaakana inda utotipuaka manga pogau motorangona mboo akala momalape maka satotuuna tangkanamo kagau-gau,

<sup>5</sup> roonamo moomini iaku inda kupobhawa tee ingkomiu, maka o rohiku apoose tee ingkomiu. Iaku bhekukaunde-unde wakutuuna kurango

ande o dhadhimiu aose dhala momakate tee usadhaadhaa umatangka i nuncana kayaakinimiu tee Al Masi.

*Tadhadhi Malape i nuncana Sarona Al Masi*

*2:6-15*

<sup>6</sup> Ingkomiu utarimamea o Isa Al Masi Oputa Momalanga. Rampaakanamo sumai, ingkomiu tabeana udhadhi uposaangu tee Incia.

<sup>7</sup> Ingkomiu tabeana ukokulese i nuncana sarona tee ubhangua o dhadhimiu, tee o Al Masi upamembalia mboomo fondasina. Ingkomiu tabeana usadhaadhaa umatangka i nuncana iimanimiu mboomo mopadhana iadhariakana to ingkomiu, tee ingkomiu tabeana abhari mpuu uemani usukuru.

<sup>8</sup> Ingkomiu tabeana upengkaanaka, ancotala dhaangia o mia mowuju-wujukomiu tee atipuakakomiu tee manga fahamu inda mokinguna tee mopasaladhalakomiu. Manga pogau incia sumai inda aminaaka i Al Masi, maka aminaaka i kaadharina maanusia tee aminaaka i manga rohi i nuncana dunia.

<sup>9</sup> Roonamo i nuncana Al Masi bhari-bharia sifatuna Aulata'ala amboore, siitumo i nuncana badana Karona.

<sup>10</sup> Tee o dhadhimiu padhamo apamondoakakomiu i nuncana sarona Al Masi tee Inciamo kapalana bhari-bharia pamarinta tee mokenina kuasa.

<sup>11</sup> I nuncana sarona Al Masi ingkomiu padhamo utotandaki, tee mencuana tandaki ikarajaana maanusia, maka tee tandaki ikarajaana Al Masi, mopabebasikomiu minaaka i isikadina maanusia mokodosa minaaka i karomiu.

<sup>12</sup> Roonamo wakutuuna utopapebhaho, ingkomiu akoburukomiu upobhawa-bhawa tee Incia, tee i nuncana papebhahoka sumai ingkomiu uka uose apadhadhikomiu pendua upobhawa-bhawa tee Al Masi roonamo ingkomiu uparacaea tee kuasana Aulata'ala mopadhana mopadhadhina Al Masi minaaka i mate.

<sup>13</sup> Ingkomiu uka i piamo itu umate rampaakanamo dosamiu tee roonamo ingkomiu inda utotandaki tee uose nawusuumiu. Maka o Aulata'ala apadhadhikomiu pendua upobhawa-bhawa tee Incia.\* Aulata'ala a'amponi dosata,

<sup>14</sup> tee ahapusu surana dhosata tee bhari-bharia saratina hukumuna Taurati momangabhalina tee mangapanarakaana.† Aulata'ala ahapusu surana dhosata sumai tee apasoa i kau salib.

<sup>15</sup> Alaloi mateana i kau salib sumai, Al Masi apewau bhari-bharia rohi mokokuasa tee mopekaparinta amembali inda tee kuasana, tee manga incia apekaeia mamudhaakana manga mia i dunia sii amataua ande o Al Masi padhamo atalo manga incia.

*Peelomo Hali Mboomo Modhaangiana i Bhawo Sii*

*2:16--3:4*

<sup>16</sup> Rampaakanamo sumai, bholi utaroakea o

---

**2:12 2:12** Rom. 6:4. **2:13 2:13** Ef. 2:1-5. \* **2:13 2:13** apadhadhikomiu pendua upobhawa-bhawa tee Incia: Dhaangia uka manga kaburi mopogauna "Incia mangapadhadhi pendua tapobhawa-bhawa tee Incia." **2:14 2:14** Ef. 2:15. † **2:14 2:14** bhari-bharia saratina hukumuna Taurati momangabhalina tee mangapanarakaana: Ma'anana roonamo maanusia inda aose hukumuna Taurati, sabutuna o Aulata'ala abhalia. **2:16 2:16** Rom. 14:1-6.

mia ahaakimukomiu tee apasalakomiu pokaiana tee kinande ikandemiu tee giu isumpumiu, roonamo aabhia aharamu i nuncana agamana manga incia. Ingkomiu uka utopasala roonamo inda uraraeaaka eona raraeana agamana, bula bhaau, atawa o eona Saputuu.

<sup>17</sup> Bhari-bharia sumai tangkanamo polanciringa tee opea bhemomembalina naile itu, sainamo bhanguna motokamatana satotuuna o Al Masi.

<sup>18</sup> Bholi utaroakea mia mogauna moparaparana mopaporitambena karona tee mosombana malaa'ekati ahaakimukomiu tee asarongikomiu mia inda molaengana momembalina uumatina Aulata'ala. Manga mia incia sumai apengkeni pekatangka i pokamatana tee asomboaka karona inda tee alasana alaloi fikirina moosena nawusuuna dunia.

<sup>19</sup> Incia inda apengkeni i Al Masi momembalina Bhaa, modhawuna kinande to saangua bada amembaliaka aposaangu tee losuana tee uwana. Alaloi Bhaa sumai saangua badata atuwu mboomo kapeeluana Aulata'ala.

<sup>20</sup> Ingkomiu umate upobhawa-bhawa tee Al Masi tee padhamo apabebasikomiu minaaka i rohi mokuasaina dunia. Rampaakanamo sumai, apokia ingkomiu tabeana udhadhi mboomo mia ikuasaina dunia sii? Apokia ingkomiu utungku tee tutura mboo sii,

<sup>21</sup> "Bholi ukeni incia sii! Bholi upenami incia itu! Bholi udhingku incia sii!"?

<sup>22</sup> Bhari-bharia sumai o pokaiana tee manga

hali bhemomofuna sapadhana atopake, tee tangkanamo aose tutura tee kaadhari ipewauna maanusia.

<sup>23</sup> Inciamo manga tutura sumai o kamataana a'aarifu mpuu. Tutura mboo sumai apapori-aroa ibaadatai ikarajaana karona, pemingkuina apara-para apaporitambe karona, tee kasikisaana badana karona, maka bhari-bharia sumai inda mangatulungi to tajaganiaka pegiu-giuna fikiri momadhaki mominaakana i badata tee i ngangarandata karota.

### 3

<sup>1</sup> Rampaakanamo ingkomiu padhamo apadhikomiu pendua upobhawa-bhawa tee Al Masi, ingkomiu tabeana upeelo to upotibhaaka manga hali i sorogaa\* i tampana Al Masi aparinta tee auncura i weta kaanana Aulata'ala.

<sup>2</sup> Fikiriakamo manga hali i sorogaa, bholi ufikiriaka manga hali i dunia,

<sup>3</sup> roonamo ingkomiu umate, tee o dhadhimiu mobakaa atobuniaka apoose tee Al Masi tee aposaangu tee Aulata'ala i nuncana sorogaa.

<sup>4</sup> Wakutuuna Al Masi momembalina dhadhita sumai apatiumba karona naile itu, ingkomiu uka bheutopatiumba upobhawa-bhawa tee Incia i nuncana kamuliangina.

#### *Maanusia Bhaau*

#### *3:5-17*

<sup>5</sup> Rampaakanamo sumai, pekamatemea o kapeeluumiu to manga nawusuu mominaakana

---

**3:13:1** Zab. 110:1. \* **3:13:1** *upotibhaaka manga hali i sorogaa:*  
Daftarana manga hali i sorogaa atokamata i aeati 3:12-14

i dunia momadhaki sii i nuncana karomiu, siitumo pewau pasunda, giu monaajisi, nawusuu, kapeeluata to tapewau manga giu madhaki, tee kaso'o, roonamo kaso'o sumai apokanamo tee mosombana barahala.

<sup>6</sup> Manga giumo mboo sumai iumbaakana pamuruna Aulata'ala to manga mia modorohaka.

<sup>7</sup> I piamo itu uka ingkomiu upewau manga giu incia sumai, wakutuuna o dhadhimiu adhaangia i tambena kuasana.

<sup>8</sup> Maka sii-sii, ubhanakamea manga giu madhaki modhaangiana i karomiu mboomo amara, lumbuna inca, dhika-dhikaana bukuna inca, tee fitanaa. Bholimo upalimba pogau marombu minaaka i ngangamiu.

<sup>9</sup> Bholi upopagau-gau podho-podho ingkomiu, roonamo dhadhimiu tee sifatumiu momangenge ubholimea.

<sup>10</sup> Ingkomiu sii-sii padhamo adhawuakakomiu dhadhi mobhaau, tee o Aulata'ala Mopadhaangiakomiu dhaangiapo atorotorosu apamembalikomiu mamudhaakana ubhaau mboomo gambarana karona, ma'anana mamudhaakana ingkomiu amondo umatau Aulata'ala.

<sup>11</sup> I nuncana giu incia sii indamo dhaangia o posalana o mia inda motolentuna miana Yahudi tee miana Yahudi, mia mototandaki tee mia inda mototandaki, miana Barbar tee miana Skit, bhatua atawa o maradhika. Maka bhari-bharia soo apokanamo roonamo Al Masi i bhawona bhari-bharia mia incia sumai tee amboore i nuncana bhari-bharia mia moparacaeana tee Incia.

<sup>12</sup> Rampaakanamo ingkita tamembali mia mopadhana ipilina, ipekanakilona, tee imaasiakana Aulata'ala, sumaimo upomaamaasiakamo, pekalapea o incamiu, paporitambea o karomiu, pekalulua o bhoasakana pogaumiu, tee utarai kanarakaa.

<sup>13</sup> Posabasabaraakamo podho-podho ingkomiu tee upo'ampo'amponimo, ande dhaangia samia i tanga-tangamiu moabhina mia mosagaanana asala, jadi ingkomiu tabeana upo'ampoamponi podho-podho ingkomiu mboomo Kawasana Opu a'amponikomiu.

<sup>14</sup> Tee mofaraluuna mpuu satotuuna: Ingkomiu tabeana upomaamaasiaka, roonamo o kaasi sumai mopamondona posaanguamiu.

<sup>15</sup> Tabeana o dhadhi pomalapena Al Masi adhaangia i nuncana karomiu, roonamo to giumo incia sumai ingkomiu utokemba to umembali saangu bada, tee usukurumo.

<sup>16</sup> Tabeana o kaadharina Al Masi mobukeakana kabarakati sumai apesua i nuncana ngangaramiamiu. Upoadhaadharimo tee upoudhaudhaniakamo tee cara mo'aarifu. Laguakamo zaburu, lagu kapujia, tee manga lagu idhawuakana Rohi Momangkilo tee uemani sukuru i nuncana ngangaramiamiu.

<sup>17</sup> Opea ibhoasakamiu tee ipewaumi tabeana bhari-bharia upewaua i nuncana saroni Isa, Oputa Momalanga tee uemanimo sukuru i Aulata'ala Amata alaloi Al Masi.

*Pokaiana Antona Miana Bhanua i nuncana  
Dhadhi Bhaau  
3:18--4:6*

<sup>18</sup> E manga bhawine mokoumane, ta'atimo tee umanemiu, mboomo molaengana ipewauna manga mia moparacaeana tee Kawasana Opu.

<sup>19</sup> E manga umane mokobhawine, maasiakea o bhawinemiu tee bholi upekapiia incana.

<sup>20</sup> E manga anaana, osea bhari-bharia parintana inamiu tee amamiu, roonamo giu incia sumai amasanaakea incana Kawasana Opu.

<sup>21</sup> E manga witinai momembalina ama, bholi upekapii incana manga anamiu, mamudhaakana manga incia inda amate o akalana.

<sup>22</sup> E manga witinai momembalina bhatua, osee bharibharia parintana opumiu i dunia sii, bholi tangkanamo i aroana wakutuuna akamatomiu, mamudhaakana upasanaa incana, maka uosea o parintana manga incia tee relana totona incamiu tee umaeka tee Kawasana Opu.

<sup>23</sup> Opeapo uka ikarajaamiu, ukarajaaii tee mpuu-mpuuna incamiu, mboomo ukarajaa to Kawasana Opu tee mencuana ukarajaaka to maanusia.

<sup>24</sup> Tee wakutuuna ukarajaa mboo sumai, udhanimeia ingkomiu bhemotarimana tinauraka mominaakana i Kawasana Opu to momembalina ponambomiu, roonamo Isa Al Masi satotuuna Oputa Momalanga tee ingkomiu o bhatuana.

---

**3:18 3:18** Ef. 5:22; 1Ptr. 3:1.      **3:19 3:19** Ef. 5:25; 1Ptr. 3:7.  
**3:20 3:20** Ef. 6:1.      **3:21 3:21** Ef. 6:4.      **3:22 3:22-25** Ef. 6:5-8.

<sup>25</sup> Incema mopewauna kasalaha, bheatanggoa karonā o kasalahana sumai, roonamo Kawasana Opu inda akamata mia minaaka i rouna.

## 4

<sup>1</sup> E manga witinai momembalina opu! Ingkomiū tabeana ubanara tee u'adili tee bhat-uamiū. Udhania ande ingkomiū dhaangia tee Opumiū uka i sorogaa.

<sup>2</sup> Ingkomiū tabeana usadhaadhaa uraji udo'a, upoose ukojaga-jaga tee uemani sukuru i nuncana do'amiū sumai.

<sup>3</sup> Tee udo'aaka uka to ingkami mamudhaakana o Aulata'ala mangabungkaleaka bhambana kalalesa to tapakoleleaka firimanina to Al Masi, siitumo o Lele Malape momembalina rahasia kangengena sii tee rampaakanamo kupakoleleakea itotorongkuakaku.

<sup>4</sup> Tee mboo sumai, iaku amembali kupatindaia opea bheipakawaakaku mboomo laengana.

<sup>5</sup> I nuncana pokaiamiū tee manga mia inda moparacaea, ingkomiū tabeana u'aarifu tee upakea o wakutuumiū pekalape.

<sup>6</sup> Bhoasakana pogaumiū tabeana apasanaa ngangaranda tee amaasiakea mia morangoa, tee ingkomiū tabeana umataua tuaapa o carana ulawani manga mia moabhakikomiū samia-samia.

*Katutubhi tee Salamu*  
*4:7-18*

<sup>7</sup> Tikhikus o witinai imaasiakata, bheapaumbaakakomiu sagala hali o pokaiana tee iaku. Incia ata'ati akarajaa apoose tee ingkami to alaiani Kawasana Opu.

<sup>8</sup> Rampaakanamo sumai, incia kulambokoa to ingkomiu tee kuhususakea to umatauaka kadhaangiamami, tee mamudhaakana ahiburukomiu.

<sup>9</sup> Tikhikus kutumpua alingka apobhawa-bhawa tee samia moparacaeana tee Isa tee imaasiakata siitumo Onesimus. Onesimus sii uka aminaaka i witinaimiu i jama'a i kota Kolose. Rua miaia witinaita sii bheapetula-tulaaka pokaiana tee bhari-bharia kadhaangia momembalina iwe sii.

<sup>10</sup> Aristarkhus sabhangka mopobhawa-bhawana tee iaku i nuncana katorongku, tee o Markus tolidhana Barnabas alamboko salamuna to ingkomiu. (Ingkomiu padhamo utarima kasameaku mamudhaakana upepagoa ande aumbatikomiu.)

<sup>11</sup> Tarimaia uka o salamuna Yusak isarongiaka uka Yustus. Tangkanamo talu miana sii o miana Yahudi mopoosena tee iaku i wakutuuna kulaiani Isa i nuncana Pamarintana Aulata'ala, tee manga incia mohiburuaku.

<sup>12</sup> Salamu uka minaaka i Epafra. Incia o mia mominaakana i lipumiu tee o bhatuana Al Masi mosadiana modo'aakakomiu tee mpuu-mpuuna incana, mamudhaakana ingkomiu umatangka

---

**4:7 4:7** Tul. 20:4; 2Tim. 4:12.      **4:7 4:7-8** Ef. 6:21-22.      **4:9**  
**4:9** Flm. 1:10-12.      **4:10 4:10** Tul. 12:12; 12:25; 13:13; 15:37-39;  
 19:29; 27:2; Flm. 24.      **4:12 4:12** Kol. 1:7; Flm. 23.

tee uparacaea mboo mia mokawana umuruna  
tee ingkomiu utotuu-totuu uyaakini tee uta'atia  
bhari-bharia kapeeluana Aulata'ala.

<sup>13</sup> Iaku kusakusiiakea karoku, ande incia  
akarajaa totuu-totuu tee kakaana bukuna to in-  
gkomiu tee uka to manga mia i kota Laodikia tee  
kota Hierapolis.

<sup>14</sup> Lukas o dhotoro imaasiakata tee Demas uka  
alamboko salamuna to ingkomiu.

<sup>15</sup> Pakawaakea o salamuku to manga witinai i  
Laodikia, tee uka to Nimfa tee jama'a i bhanuana.

<sup>16</sup> Sapadhamiu ubaca sura incia sii, usahaakea  
mamudhaakana ubacaakea uka to jama'a i kota  
Laodikia. Mboomo uka sura ilamboko i Laodikia,  
ingkomiu tabeana u'usahaakea uka to ubacea i  
tanga-tangamiu.

<sup>17</sup> Pakawaakea o kasameaku sii to Arkhipus,  
"Udhania pekalape, ingkoo tabeana ukarajaaia o  
tugasi itarimamu minaaka i Kawasana Opu."

<sup>18</sup> Salamu minaaka i iaku, o Paul. Salamuku  
sii kuburia tee limaku karoku. Udhania ande  
iaku tangasaana kutotorongku! Maasangia o  
Kawasana Opu arahumatikomiu.

## **Kitabi Momangkilona Wolio**

### **Wolio: Kitabi Momangkilona Wolio (New Testament+)**

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

---

PDF generated using Haiola and XeLaTeX on 26 Jul 2025 from source files dated 10 Jul 2025

7df9af1f-1c49-59d2-a164-bde0a20127b3